

## आकाशवाणी

Morning Dogri (NSD) Bulletin 13-12-2025

खास-खास खबरां:-

- सरकारै कोहले दी लिकेज नीलामिये लेई कोल-सेतू नीति गी मंजूरी दिती ऐ। प्रधानमंत्री नरेन्द्र मोदी होरे आखेया ऐ जे एह गैह ऊर्जा सुरक्षा गी बढ़ावा देग।
- केन्द्री मंत्रिमंडल नै 2027 आली मरदमशुमारी लेई 11 जहार 718 करोड़ रपे मंजूर कीते न।
- संयुक्त राष्ट्र दी पर्यावरण सभा नै नैरोबी केन्या च अपने 7में इजलास दुरान जंगलें दी अगग लेई वैश्विक प्रबंधन बारे भारत दे प्रस्ता गी मंजूर करी लैता ऐ।
- अमरीकी राष्ट्रपति डोनाल्डस ट्रम्प होरे आखेया ऐ जे बन्ने पर झडफे दे बाद थाईलैंड ते कम्बोडिया नमें सिरेया संघर्ष विराम लेई राजी होई गे न।
- समूलचा राष्ट्र 2001 च संसद पर होए दे आतंकवादी हमले दे शहीदें गी अज्ज शरदांजलि देया करदा ऐ।
- चेन्नेई च अज्ज Squash विश्व कप दे सैमीफाईनश च भारत दा मुकाबला मजूदा चैम्पियन मिस्र कन्नै होग।

<><><><><><>

केन्द्र सरकार “कोल-सेतू” नीति गी मंजूरी देई दिती ऐ ते एहदा मकसद कुसैं गी औद्योगिक इस्तेमाल ते निर्यात लेई लम्मी मुद्दत आली नीलामी दी बिनाह उप्पर कोहला लिकेज आबंटन उपलब्ध करोआना ऐ। कोई बी घरेलू खरीददार इस नीलामी च हिस्सा लेई सकोग। तोंआई प्रधानमंत्री नरेन्द्र मोदी होरें आखेया ऐ जे केन्द्री मंत्रिमंडल आसेया “कोल-सेतू” नीति गी मंजूरी देना- भारत दी ऊर्जा सुरक्षा गी मजबूत करने ते विकास गी रफ्तार देने दी दिशा च इक महत्वपूर्ण गेंह ऐ। श्री मोदी होरें सोशल मीडिया दी इक पोस्ट च आखेया ऐ जे “कोल-सेतू” नीति कोहले दा बवस्थित- कुशल ते पारदर्शी इस्तेमाल सक्षम बनाने दी इक नमीं बत खोलोग। उनें आखेया जे एहदे नै बपार करने च असानी होग- घरेलू उपलब्धता बधोग ते कोहले दे आयात उप्पर निर्भरता घट्ट होग।

<><><><><><><><>

Census Cabinet

केन्द्री मंत्रिमंडल नै 2027 आली मरदमशुमारी लेई 11 जहार 718 करोड़ रुपें दे बजट गी मंजूरी दिती ऐ। सूचना ते प्रसारण मंत्री अश्विनी वैष्णव होरें कल नमीं दिल्ली च मीडिया गी जानकारी दिंदे होई दस्सेया जे 2027 आली मरदमशुमारी दंऊ चरणें च करोआई जाहग ते एह देसैं दी 16मीं ते आज़ादी दे बाद 8मीं मरदमशुमारी होग। श्री वैष्णव होरें गलाया जे भारत दी मरदमशुमारी- दुनिया दी सब्बनैं शा बड्डी प्रशासनिक ते आंकड़े सरबन्धी प्रक्रिया ऐ ते एहदे तैहत जातिगत गणना बी कराई जाहग। उनें दस्सेया जे एह पैहली डिजिटल मरदमशुमारी होग ते एहदे च Android ते IOS दौनैं मोबाईल एप्लीकेशनें दे राहें डेटा संग्रैह कीता

जाहग। उनें इब्बी दस्सेया जे मरदमशुमारी दे कम्मै च 30 लक्ख कर्मिये गी लाया जाहग ते इस प्रक्रिया दे तैहत हर इक घरे तगर जनगणना कर्मी पुज्जगंन।

<><><><><><>

## PM Visit

प्रधानमंत्री नरेन्द्र मोदी औंती 15 दिसम्बर थमां जार्डन- इथोपिया ते ओमान दे दौरे पर रवाना होगंन। इस बारे नर्मी दिल्ली च मीडिया गी जानकारी दिंदे होई वदेश मंत्रालय दिये सचिव डाक्टर नीना मलहोत्रा होरे दस्सेया जे प्रधानमंत्री हुंदी एह जातरा जार्डन नरेश अब्दुल्ला द्वितीय बिन अल हुसैन हुंदे साददे पर 15 ते 16 दिसम्बर गी होआ करदी ऐ। सचिव होरे दस्सेया जे प्रधानमंत्री हुंदा जार्डन दा एह पैहला-पैहला दौरा दौने मुखे बशकार कूटनीतिक सरबंधे दी स्थापना दे 75एं बरे दे मौके पर लग्गा करदा ऐ। इस दरान दौने नेता आपसी सरबंधे दे सब्बने पैहलुएं दी समीक्षा करगंन ते इलाकाई मुद्दे पर बी बचार बटांदरा करगंन। डाक्टर मलहोत्रा होरे दस्सेया जे 16 ते 17 दिसम्बर गी प्रधानमंत्री हुंदा इथोपिया दा दौरा आपसी सैहयोग गी होर तगड़ा बनाने दी भारत दी वचनबद्धता गी दर्शादा ऐ। 17 ते 18 दिसम्बर गी श्री मोदी हुंदे ओमान दे दौरे बारे जानकारी दिंदे होई सचिव अरुण कुमार चैटर्जी होरे दस्सेया जे इस दौरे दौरान इक उच्ची सतह दा डैलीगेशन बी श्री मोदी हुंदे कन्ने ओमान जाहग।

<><><><><><>

## UNEA Forest Fire

जंगलें च लग्गने आली अग्ग दे आलमी प्रबंधन गी तगड़ा बनाने बारे भारत दे प्रस्ताऽ गी कल नैरोबी- केन्या च संयुक्त राष्ट्र पर्यावरण सभा दे 7में इजलास च अपनाई लैता गया ऐ। भारत दे इस प्रस्ताऽ गी सदस्य देसें दा बड़ा मता समर्थन हासल होआ। इक ब्यान च पर्यावरण- जंगलात ते जलवायु परिवर्तन मंत्रालय नै आखेया ऐ जे भारत दा मनना ऐ जे जंगलें च अग्ग लग्गने दियां घटनां- आलमी सतह पर पर्यावरण सरबंधी सब्बनें शा बड़ी चुनौतियें चा इक दे तौर पर उभरियें सामने आई ऐ ते भारत दे प्रस्ताऽ दा मकसद जंगलें दी अग्ग दे प्रबंधन लेई अंतराष्ट्री सहयोग दे तालमेल आली कारवाई गी होर तगड़ा बनाना ऐ। इस प्रस्ताऽ च आखेया गया ऐ जे दुनिया भरै दे मुल्खें च जंगलें दी अग्ग आली घटनाएं दी गिनतरी- पैमाने ते तीव्रता च बाददा दिक्खने गी लब्बा करदा ऐ।

<><><><><><>

Trump Thailand Cambodia

अमरीकी राष्ट्रपति डोनाल्ड ट्रम्प होरें घोषणा कीती ऐ जे थाईलैंड ते कम्बोडिया इक बारी परतियें युद्धविराम समझौते गी नमें सिरेया अगड़े बधाने लेई राजी होई गेन। उनें इस समझौते लेई अपने व्यक्तिगत दखल ते मलेशियाई प्रधानमंत्री अनवर इब्राहिम हुंदे सहयोग गी श्रेय दिता ऐ। इस्सै दौरान थाईलैंड ते कम्बोडिया दे बन्ने पर इक हफते सवां चला रदे संघर्षे ते झड़फ्फे च घट्टो-घट्ट 20 लोक मारे गेन। इस दौरान लगभग 5 लक्ख लोक अपना घर-बाहर छुड़ियें दुई थाहरें उठी गेदे न। इक सोशल मीडिया पोस्ट पर ट्रम्प होरें आखेया जे उंदी

थाईलैंड दे प्रधानमंत्री अनुतिन चनविराकुल ते कम्बोडिया दे प्रधानमंत्री हुन-मानेट हुंदे कन्नै बड़ी अच्छी गल्लबात होई ते दौने नेताएं गोलीबारी बंद करने पर सैहमती जताई।

<><><><><><>

#### Tributes Parliament Attack

समूलचा राष्ट्र 2001 च संसद पर होए दे आतंकी हमले च शहीद होए दे सुरक्षकर्मियें गी श्रद्धाजलि भेंट करा रदा ऐ। अज्जै दे रोज 13 दिसम्बर 2001 गी आतंकवादियें संसद पर बड्डा हमला कीता हा- जिसी उत्थे तैनात सौहगे सुरक्षा कर्मियें अपनी मुसतैहदी ते दलेरी कन्नै नाकाम करी दिता हा। उपराष्ट्रपति ते राज्यसभा दे चेयरमैन सी.पी. राधाकृष्णन- प्रधानमंत्री नरेन्द्र मोदी- लोकसभा दे स्पीकर ओम बिरला - केन्द्री मंत्री ते सांसद अज्ज संसद च इस हमले गी नाकाम बनांदे होई शहीद होए दे सुर्गवासियें गी पुष्पांजलि भेंट करगंन। संसद पर होए दे आतंकी हमले दी 24मीं बरसी दे सिलसिले च दौने सदनें च कल बी इनें शहीदें गी भावे-भरोची शरदांजलि भेंट कीती गेई ही।

<><><><><><>

#### Intruder Apprehended

जिला पुलस जम्मू नै सोशल मीडिया दे राहें एह जानकारी दिती ऐ जे सुरक्षाबलें कल जम्मू जिले च अंतराश्ट्रीय बन्ने दे कोल इक संभावित खतरे गी नाकाम करी दिता ऐ। बी.एस.एफ नै परगवाल इलाके च अंतराश्ट्रीय बन्ने कश इक घुसपैठियें गी इक थ्हेयार दे कन्नै फगड़ेया ऐ। इब्बी दस्सेया गया ऐ जे संदिग्ध

गी अग्गे दी कन्नी कारवाई लेई पुलस पोस्ट परगवाल गी सौंपी दिता गया ऐ।  
अधिकारिये दस्सेया जे जांच जारी ऐ ते इलाके दी सुरक्षा गी यकीनी बनाने लेई  
बन्ने पर चौकसी होर निग्गर कीती जा रदी ऐ।

<><><><><><>

#### LG Appointment Letters

उपराज्यपाल मनोज सिन्हा होरें कल श्रीनगर च नौगाम हादसे च होए दे धमाके  
दे शहीदें दे परोआरें कन्नै मलाटी कीती ते उनेंगी अनुकंपा दे आधार पर  
नियुक्ति पत्र सौंपे। शहीदें गी श्रद्धांजलि दिंदे होई उपराज्यपाल होरें आखेया जे  
पूरा मुख्य सोगी परोआरें दे कन्नै खड़ोते दा ऐ तां जे ओह इस गल्लै गी  
यकीनी बनान जे ओह रमानदारी ते सम्मान कन्नै जींदे न। उनें इब्बी आखेया  
जे मुख्य गी जम्मू-कश्मीर पुलस पर गर्व ऐ जे उनें पिच्छले महीने इक आतंकी  
नैटवर्क गी खत्म करी दिता ऐ। उनें आतंकवादी गतिविधियें दा पता लाने-  
उनेंगी रोकने लेई उन्दी पूरी जांच ते बहुआयामी जतनें दी बी सराहना कीती।।  
एहदे इलावा उपराज्यपाल होरें अफसरें गी निर्देश दिते जे ओह आतंकवाद लेई  
रपेया-पैहा उपलब्ध करोआने आलें दी नकेल कस्सने ते पूरे जम्मू-कश्मीर च  
कट्टरवाद खलाफ जतनें गी खत्म करन।

<><><><><><>

#### Train Timing Revise

उत्तरी रेलवे नै यात्रियें दी सुविधा गी ध्यानै च रखदे होई श्री माता वैष्णो देवी  
कटड़ा- नर्मो दिल्ली बश्कार चलने आली वंदे भारत एक्सप्रेस रेलगड्डी दे समें च

पैहली जनवरी 2026 थमां बदलाव करने दा फैसला लैता ऐ। नमें कार्यक्रम मताबक गड्डी नम्बर 22440- हून अम्बाला कैन्ट जंक्शन थमां रातीं 8 बजियै 52 मिनट दी थाहर- 8 बजियै 48 मिनट पर चलोग ते नमीं दिल्ली स्टेशन पर रातीं 11-10 दे बजाय 11 बजे पुज्जा करोग। समें च ए बदलाव श्री माता वैष्णो देवी दे शरदालुएं ते होरनें यात्रियें दे इस लोकप्रिय रुट पर सुविधाजनक सफर यकीनी बनाने लेई कीता गया ऐ।

<><><><><><>

Squash

चेन्नेई च अज्ज स्क्वैश विश्व कप दे सैमीफाईनल च दुए नम्बरै आली टीम भारत दा मुकाबला मजूदा चैम्पियन मिस्र कन्नै होग। एदे इलावा दुए सैमीफाईनल च पैहले नम्बरै आली टीम हांगकांग दा मुकाबला जापान कन्नै होग। कल क्वाटर-फाईनल च मिस्र नै आस्ट्रेलिया गी 3-0 कन्नै हराइयै भारत गी सैमीफाईनल च पुजाया- उत्थै गै भारत नै दक्खन-अफ्रीका गी 3-0 कन्नै शिकस्त दिती।

<><><><><><>